



Un 'Sensory Scan' por yuda bo yuda un persona cu Autismo

Fundacion Autismo Aruba ta den un colaboracion unico cu Valerie Paradiz di 'Integrated Self-Advocacy' pa asina brinda servicionan pa personanan cu Autismo via un programa di Merca. Loke normalmente nos lo por solamente admira for di internet of otro media Mericano, awo tin su posibilidad pa implementa na Aruba den forma di e asina yama 'Sensory Scan'. Mayornan den grupo di training na FAA a haya un presentacion via webinar di sra. Paradiz, kende su mes tin Asperger Syndrome, pa asina splica e rol grandi cu e sentidonan (hypersensitivo o hyposensitivo) y su procesamento ta nifica pa un persona cu Autismo. Ta asina cu personanan cu Autismo tin dificultad entre e 5 sentidonan en combinacion cu 2 sentido mas cu den un persona regular nos lo no usualmente para keto riba dje. Banda di holer, mira, sinti, tende y smaak, un persona cu un trastorno cu ta afecta e procesamento di sentidonan lo tin den mayoria caso un problema cu e sentido vestibular (loke ta yuda bo sinti con bo ta move den un espacio of ta boca abao) y e sentido propioceptivo (bo curpa y su distancia cu obhetonan).

Loke un 'Sensory Scan' ta haci, ta cu e ta muestra mayornan y profesionalnan con un persona cu Autismo ta procesa zonido, bista etc. den un camber of klas. Mirando cu personanan cu Autismo tin dificultad pa comunica loke nan ta sinti y e parti social di e individuo semper ta muestra di tin stagnacion, nan lo no laga sa kico di e ambiente rond, ta molestia of afecta nan. Esaki ta conduci na loke nos ta yama 'Sensory Overload' cu ta hopi biaha bisto den comportacion negativo di e persona cu Autismo. Loke bo lo wak por ehempel ta un "tantrum," esta cu e mucha of persona ta manera perde sinti y ta zapatea, of un paro den productividad di e persona.

'Sensory overload' por ta algo cu un persona cu Autismo ta experiencia diariamente, caminda cu no tin comprension pa su mundo. Pa evita comportacion extremo y compronde e persona cu Autismo su procesamento di e bida diario, unda e ta come, sinta, siña y hunga, ta necesario pa sa kico lo haci e sinti mas confortabel.

Tin un proceso pa cu e scanning y e ta aplicabel pa tur tipo y nivel den e spectrum di Autismo. Y bou guia di ISA (na Merca), mayornan y profesionalnan lo por completa e proceso di scanning. Locual ta sigui despues ta un acercamento cu ta contene consehonan traha door di e guianan di ISA mes. E costo ta minimal, di 45 dollar Mericano. Un percentage chikito di e suma aki ta pa cubri costonan di FAA, den forma di donacion.. Pa mas splicacion tocante e proceso di scanning, por acudi na Fundacion Autismo Aruba na Irenestraat 21 of yama na 5881179.

Un danki na ISA (Integrated Self Advocacy curriculum), Valerie Paradiz y Autism Research Institute cu ta haci e herment importante y inovativo aki un posibilidad pa nos na Aruba, asina pushando nos mas a leu den e progreso di nos cuido pa personanan cu Autismo riba nos isla!